

- 1' Wer syn mul / vmb eyn sackpiff gytt
- 2' Der selbs / syns tuschens gnûsset nytt
- 3' Vnd muß oft gan / so er gern rytt



von dorechtem wechsel.

- 1 Vil grösser arbeyt hatt eyn narr
- 2 Wie das syn sel zûr hellen far
- 3 Dann keyn Eynsidel vor ye hatt
- 4 In aller wûst / vnd heymlich statt

---

2' tuschens *GW5046 GW5047* ] tufehens *GW5041*

5 Do er dient vastend / bettend / gott  
 6 Man sicht was hochfart arbeit hat  
 7 Wie man sich mutz / schmyer / nestel / bryß  
 8 Vnd hörte drük lyd / jnn manche wise  
 9 Der gydt tribt manchen über see  
 10 Durch vngewitter / råg / vnd schne  
 11 In Norwegen / Pylappen landt  
 12 Keyn rûw noch rast / die bûler handt /  
 13 Die spyeler haben übel zyt /  
 14 Vil mer der schnapphan / der do ryt  
 15 Vff *den* halßacker wogend sich /  
 16 Des prassers will gschwigen ich  
 17 Der all zyt vol ist / vmb syn hertz  
 18 Was drück der lyd / vnd heymlich schmerz  
 19 Des yfers zyt / ist nit die best  
 20 Er vörcht eyn andern gouch jm nest  
 21 Syn eygen glider kocht der nydt  
 22 Nyemans durch gottes ere sich lydt  
 23 Der jn gedult an sâh syn sel  
 24 Als Noe / Job / vnd Daniel  
 25 Gar vil sint / den das böß gefeltt  
 26 Gar selten der das gût erwelt  
 27 Erwölen gûts eyn wiser soll  
 28 Das böß kunt all tag selbes wol  
 29 Wer gibt das hymelrich vmb myst  
 30 Der ist eyn narr / so vil syn ist  
 31 Syn duschen der genüset nitt  
 32 Wer ewigs vmb zergenglichs gytt  
 33 Vnd das ichs kurtz mit worten bgriff  
 34 Gybt er eyn esel / vmb eyn pfiff

---

8 hörte GW5046 GW5047 ] herte GW5041 15 den ] dem GW5041 GW5046 GW5047